

BEROMANO

É Kálara Apostol Pablo a ngá tsili Beromano

Mebéránn

1 ¹Ma Pablo, óloá Kristo Yesus, ntélán mfá ábo apostol, ntópbán amvála etámm á mfá é mbamba fwéñ Nzamá, ²édí a ngá tára kyaa ébe békúlu medzó beñ Mítsili mí ne eki été, ³á mfá é Mwán weñ, éñí a ngá byála ané mot binam é mvɔɔ bot David, ⁴a lére fe ya nguu edzwée ná a ne é Mwán Nzamá mfá Nsísim a ne eki, amú nwómán miwúán, Ntí wea Yesukristo.

⁵Ébe éñí, bía ñɔɔ abwará ya ntélán ápostol, mfá ábo mbwínánn mewók ébe meɔɔ mefé mése amú éyola deñ, ⁶éde énzénzanɔɔ deba, mína míní ne fe é bot bé ne ntélán ná bé ɔɔ ébá Yesukristo. ⁷Mfá mína bése sé míndzindziɔɔ Nzamá míní ne á Roma, ntélán á mfá eki. Mvwaá ya mvɔmm bí ɔɔge ébe mína, bíí sɔ ébe Nzamá Éséá wea ya ébe Ntí Yesukristo.

Mvéán akíba

⁸Ma tára vé é Nzamá wɔm akíba ébe Yesukristo mfá mína bése sé, ná eniɔ ngúrá dá kóɔ á mfá mbwínánn wenan. ⁹Amú ná é Nzamá ma kaɔ á nsísim wɔm été, mfá nkatann mbamba fwéñ é Mwán weñ, a ne ma ngañiá ámvála ma síman mína kaa ádzɔɔ, ¹⁰á méyaglán mam été tám áse, meé dzaa éndagá á mfá nkómánn Nzamá, ná me belé afóo ye ánzú ébe mína. ¹¹Amú ná ma bíra mína kómo yén, ná me kalan mína mvɔmm enziɔ ye á nsísim, á mfá ye ná míní ɔɔɔ nyémán nguu; ¹²dá yíli ná me ɔɔ énzénzanɔɔ denan, bí yémján nguu fufúlu, kada mot ye á mbwínánn éñí mbɔɔ, ané éewenan ané éewɔm.

¹³Á ɔɔbédzanɔɔ, máá kómo ná míní dzími ná me dzéñ yaá ɔɔ ngoman, ná me nzu mína fép, (ve ye anzukwíñ éndagá, bé dzip yaá ma dɔ), á mfá

ye ná me belé fe ebumá enziŋ ye á nsísim énzénzanŋ denan, ntéññ mbóó fe ané ébe méyɔŋ mefé mevóó. ¹⁴Me belé mvólá atéé ye begriego akekwiñ ébá bé sés begriego, ané ébá bé ne bebelé kén akekwiñ ébá bé sés mifefák; ¹⁵édo ná, mfá wɔm, me belé ededea nkómánn ye ákat fe mína mbamba fwéñ, mína é bot míní tóó á Roma.

Mbamba fwéñ, é nguu Nzamá

¹⁶Amú ná mää wók mbamba fwéñ osoán; éñe fá a ne é nguu Nzamá mfá ákoroga ye éñí áse aa bwíni; mwann Judio ósúá, ya fe mwann Griego. ¹⁷Amú ná éñe é nzósoó Nzamá aa léreban été, ákála mbwínánn ya á mfá mbwínánn amvála ané é ne ntsilann ná: “Nzósoó mot aa ye nin amú mbwínánn.”

Bésesé bé belé meku

¹⁸Amú ná méyéá Nzamá má léreban atéé ye á dzóp été mé tóó á ngamm áyát á mboann óse ya ékúkwát ése é bot bá dzíp bebélá ya ékúkwát; ¹⁹éde ya é dzam bé ne fá yem ya do Nzamá, é léreban yaá ébe bó; amú ná Nzamá a lére yaá bó do. ²⁰Akála ná atéé ye bé ngá vele enin, é mam Nzamá mé ne kaa áyéne, é nguu deñ e ne mbéámbéa ya étóó Nzamá deñ, bé túga yaá byo yén éndendaŋ ya nzenn ye é byém a ngá vele, éde béé belé fe eyalann. ²¹Dá é tóó ná bé yem yaá Nzamá ve é bó kaa ñí ávé dúmá, fáve ná bé mana nzaman á nzeze ásimánn deba été, ákút nlém deba dá é mana lígi á dzíbi été. ²²Éde, béé vága ané bebelé kén, bá bé súgan mekút. ²³Ané bé ngá tsén é dúmá é Nzamá a ne kaa ábweñ ya éyemá é mot aa bweñ, edí anwann, edí bétsít bé ne ya mebo mé nii ya edí bétsít bá dulu mebum ósí.

²⁴Ya amú dzam te, édo Nzamá a ngá kee bó á mvin mam ya mbéa bívée bíye mílém myeba été, bé nga bo é mam mé ne osoán a méñúu meba bébyen ya bébyen. ²⁵Amú ná bá tsén é bebélá Nzamá ya edí é ne mineá, bé nga kaŋ ya áséan ya é byém bí ne mvelann, amvála ané Mvele byém Émyen, éñí a ne ya olugú kómm áse. Amén.

²⁶Ya dzam te édo Nzamá a kee yaá bó bívée bí ne osoán; amú ná atwaa é binigá beba bá bé tsén yaá ámvála mbelán bé ngá byála ya wó ya éwí béé ndzí byála ya wó. ²⁷Amvála te fe avóó ya avóó befám, bá bé lík yaá ámvála nyénánn binigá bé ngá byála ya do, bé nga yón ya mbéa bívée, bevóó ya ébá bevóó, béé bo é mam mé ne osoán befám ya befám, bébyen bá bé nga ñoŋ fe é máán má yian ya évuzá deba.

²⁸Ya amú béé ndzí yén mvéañ ná bé yem Nzamá, éde Nzamá a ngá kee bó bé belé ásimánn é ne kaa eban été, á mfá ye ná bé bo é mam mé ne kaa áyian; ²⁹bé tóó ndzálánn ya ékúkwát memvála mése, mbéa bívée, onzáŋŋ akúmm, abé; ndzálánn ya evínn, nywíán bot, mitée, meduk, ya mbéa nlém, ya bé fuk bot, ³⁰bekóbo bot abé, bevíni Nzamá, bevé bot ekán, bebére

bébyen ó yóp, betéñ abé, bebo beéséá meló, ³¹ébá bé ne kaa nkée, ébá bé ne kaa ádzálá edí bá dzó, ébá bé ne kaa enúñuñ, ya ébá bé ne kaa engóngóó. ³²Bot béte, atwaa béé yem nsan Nzamá ná ébá bá bo amvála mam méte bá yian wú, se fáve ná bá bo mo, fáve ná bá yébe fe é bot bá bo mo.

Nzamá aa kík misan amvála dá yian ya bébélá

2 ¹Amú dzam te á mwann mot, wée belé amvála ó ne lére benzósoó, éñí áse o ne bo ná wa kík misan; é dzam wa kík fá ya do é mot mbóó nsan, wa vé wámyen meku, amú ná wa é mot wa kík nsan wa wa bo fe mam méte mébyen. ²Ve bía yem ná nsan Nzamá éwo ó ne bébélá mfá é bot bá bo amvála mam méte. ³Éde, á mwann mot, ye wa tém ná wa ye sáale nsan Nzamá, wa é mot wa vé é bot bá bo amvála mam méte meku, é toó ná wámyen wa wa bo amvála te avóó ya avóó? ⁴Ye ná wa byana ntam ye áñep deñ, edzíp ya nlém ó bóo ósí, kaa áñú tán ná ésós deñ édo dá ke ya wa á ndzobán? ⁵Ve amú áleét dwe ya é kaa ndzobán nlém we, wa ke wa kogle wámyen meyéá á mfá mos méyéá, éwí é nzósoó nsan Nzamá aa ye léreban, ⁶Éñí aa ye yáán ya kada mot amvála ané mibóann myeñ mí né. ⁷Édo ná, ngúrá mfá, eé vé éniñ é ne mbéámbéá ébe éñí áse aa dzéñ dúmá ya nganñ ya átoó kaa áwú ya álañan á mboann mvéáñ; ⁸ve mfá mbóó, meyéá ya meñan má eé vé ébe ébá bésese bá dzéñ ábúánn mot émyen, bá kaa ki ábo bébélá mewók fáve ná bá bo ekúkwat mewók. ⁹Midzuúk myá ye bo ya eywiññ ébe éniñ mwann mot áse aa bo abé, mwann Judio ósúá, véa mwann Griego. ¹⁰Ve, dúmá, nganñ, ya mvwaá ébe éñí áse aa bo edí é ne mvéáñ, mwann Judio ósúá, véa mwann Griego. ¹¹Amú ná ébe Nzamá oeba ngamm ó sés.

Métsinñ Moisés

¹²Akála ná é bot bése bé bo yaá nsémm kaa ná bé belé atsinñ, bá ye fe dzán kaa atsinñ; éde ébá bésese bá bé bo yaá nsémm ákoan ná bé mbelé atsinñ, bá ye fe bó kík misan amvála ané atsinñ é né. ¹³Amú ná se é bot bá wók atsinñ ébó bé ne benzósoó ósú Nzamá, fáve ná ébá bá dzálá atsinñ ébó bá ye toó benzósoó. ¹⁴Édo ná é tám meyoñ mefé, ébá bée belé atsinñ, bá dzálá edí atsinñ dá dzó amú mbyálánn weba, ébó kaa ábelé atsinñ, mfá weba bébyen bé ne atsinñ; ¹⁵bot béte bá lére ná, é mam atsinñ dá dzaa mé ne bó ntsilann mílém été, ásímánn ye á mílém deba, deé vé é nganiá, átémña deba dá biyoñ binziñ deé sóman bó, ébí bivóó byá bée kam ya bó, ¹⁶ébe é mos Nzamá aa ye kík misan amú Kristo Yesus, é mam bot bá bo mésweññ amvála ané é mbamba fwéñ wóm a ne.

Bejudio ye metsinñ

¹⁷Ve, ngé wa é mot wa dzó ná o ne mwann Judio, o toó fe ya mebúnn ya atsinñ wa vága fe ya élat mína Nzamá míní belé, ¹⁸wa yem fe nkómánn weñ,

atsiŋɗ dá dá yágale fe wa ná o tɔp édí é ne mvéáñ; ¹⁹wa tɔbo fe ya mebúnn ná wa o ne nlére nzenn midzindzimm, éyéá é bot bé ne ó dzíbi ósí, ²⁰éñí aa yágale bedzími mam, ya fe nyágale bwán; o belé fe átsiŋɗ été édí ébyen é ne nyemann ya fe édí é ne bébélá. ²¹Édo ná, wá é mot wa yágale ébá bevɔ́ɔ, ye ná wáá yágale fe wámyen? Wá é mot wa lép ébá bevɔ́ɔ ná bé taa dzíp, ye wámyen wa dzíp? ²²Wá é mot wa dzó ná bé taa bo medzián, ye wa bo medzián? Wá é mot wa víni biyemá, ye wa dut byém bíye bétemplo? ²³Wá é mot wa vága ya atsiŋɗ, ye wa lére Nzamá osoán ya ntsamann atsiŋɗ? ²⁴Amú amvála ané é ne ntsilann ná, “Éyola Nzamá é ne mbyanann énzénzan meyoŋ mefé ákála denan.”

²⁵É ne bébélá ná nkíkɗán akeé ó ne ya eban, fáve ngé wa dzálá atsiŋɗ; ve, ngé o ne ntsam metsiŋɗ, nkíkɗán akeé we wa súgan ané kaa nkíkɗán akeé. ²⁶Édo ná, ngé éñí a ne kaa nkíkɗán akeé aa dzálá édí atsiŋɗ dá mánan, ye ná báá ye lán é kaa nkíkɗán akeé weñ ané nkíkɗán akeé? ²⁷Éde fe ná, éñí a ne kaa nkíkɗán akeé é ñúu deñ, ngé aa baale atsiŋɗ kada ekanɗ, ye ná a sés wa kík misanɗ, wa é mot o ne ná, atwaa o belé atsiŋɗ ntsilann, o tɔɔ fe nkíkɗán akeé, ve wa o ne ntsam metsiŋɗ? ²⁸Amú ná mwann Judio a sés fáve éñí a ne do á mbyálánn mison, nkíkɗán akeé wá weé sés ki fáve éwí ye ó ñúu ngé ki mison. ²⁹Fáve ná, mwann Judio a ne éñí a ne do été, éde nkíkɗán akeé wá ó ne éwí ye á nlém été, akála nsísim, se amú bikanɗ; olugú ye édí te, wáá sɔ́ ébe bot, fáve ébe Nzamá.

3 ¹Édo ná, nzá abúánn é ne ná mot a ne mwann Judio, ngé ki ná nzá eban é ne ya nkíkɗán akeé? ²Abwiññ eban ébe memvála mése. Édí ósúá, amú ná Nzamá aá téle bó ná ébɔ́ átára kee bífíá byeñ. ³Éde, dzé? Ngé bevɔ́ɔ benziŋ béye été bé ngá bo kaa ábwíni, ye ná é kaa mbwínánn weba éñe aa ye bo ná mebúnn Nzamá mé bo kaa eban? ⁴É sés boban amvála enziŋ! Fáve ná, Nzamá á boɔge bébélá, mot áse ñí ya nnéneá, amvála ané é ne ntsilann ná:

“Mfá ye ná o tɔbo nzósoó ébe bífíá bywe,
ó wún fe éyoŋ bá ye wa kík misanɗ.”

⁵Ve, ngé ékúkwát dea dá bo ná é nzósoó Nzamá éñe á yéne, bía ye dzó á yá? Ye ná Nzamá éñe a ne ekúkwát éyoŋ aa lére méyéá meñ? (Ma kɔbo ané bot bá kɔbo). ⁶É sés boban amvála enziŋ! Amú ngé néa, éñe Nzamá aa ye kík eniŋ ngúra misanɗ á yá?

⁷Ve, ngé amú mineá myám éñe é bébélá Nzamá ñí a ngá tɔbo ndzálánn mfá é dúmá deñ, amú dzé bé ngén bá kík ma misanɗ amvála ané mbo misémm? ⁸Éde, amú dzé fe: “Bíá bo abé á mfá ye ná mvéáñ eé sɔ́?” (Amvála ané bot benziŋ bá kɔbo bía abé bée bán ná bía dzó). Nkíkɗán misanɗ bot bété bá yian ya wɔ.

Bésesé bé bo yaá nsémm

⁹Éde á yá? Ye bí ne mvéáñ ádan bó? É sés boban amvála enziŋ! Amú ná bí sómán yaá ané bejudio ané begriego, ná bésesé bé ne á nsémm ásí.
¹⁰Amvála ané é ne ntsilann ná:

“Mot enziŋ a sés nzósoó, atwaa mbóó!

11 Mot enziŋ ye a ne ya kén a sés, mot enziŋ ye aa dzéŋ Nzamá a sés.

12 Bésesé bé mana yaá lés;

bésesé ntéññ mbóó bé mana yaá bɔ kaa eban.

Mot enziŋ ye aa bɔ édí é ne mvéáñ a sés!

A sés atwaa mbóó!

13 Éŋgɔŋ deba é ne é sɔŋ e yóɔ,

ya ménu meba bá bɔ bée duk,

nsu beñó ó ne bíyéá byeba ásí,

14 ménu meba mé ne ndzálánn ya bibɔŋ ya fe eywiññ.

15 Mébɔ meba mé ne avóó mfá ákúlu mekií;

16 etɔɔ engóngóɔ ya ntsamann ébyɔ bí ne ménzenn meba.

17 bée ndzí yem nzenn mvwaá.

18 é wɔŋŋ Nzamá ó sés ébe bó amvála enziŋ.”

19 Ve bía yem ná édí áse atsiŋŋ dá dzó, dá dzó dɔ ya ébá bé tɔɔ átsiŋŋ ásí, á mfá ye ná anu áse é tɔbɔ ndzipbán, mot binam áse ñí a tɔbɔ fe á nsɔŋ Nzamá ásí; 20 Akála te édo mot binam áse áá ye tɔbɔ nzósoó ébe ásu deñ amú ndzálánn atsiŋŋ; amú ná atsiŋŋ édo dá sɔ ya nyemann nsémm.

Akoroga ákála mbwínánn

21 Éde éndagá, é nzósoó Nzamá ñí a léreban yaá atwaa kaa atsiŋŋ; atsiŋŋ ya bekúlu medzó bá bá dzó fe dɔ, 22 é ne ná é nzósoó Nzamá amú mbwínánn ébe Yesukristo, mfá ébá bésesé bá bwíni. Amú ná nzelann enziŋ e sés; 23 Amú ná bésesé bé mana yaá bɔ nsémm, éde fe bá súp é dúmá Nzamá. 24 Éde bá bée tɔbɔ benzósoó dás amú ábwará deñ, ya ákoroga é ne ébe Kristo Yesus. 25 Éñí Nzamá a ngá téle amvála ané eveŋ metúnŋa á mfá ndzámann misémm ákála mékií meñ amú mbwínánn, á mfá álére é nzósoó weñ, ya édzíp deñ, Nzamá eé ndzí nú táŋ misémm bé ngá tára bɔ, 26 mfá álére é nzósoó weñ éyɔŋ dí, ná éñe a ne nzósoó, ya éñí a bɔ nzósoó é mot a belé mbwínánn ébe Yesus.

27 Édo ná, mevágá mé ne ó vé? Mée belé afóo. Ya atsiŋŋ avé? Ye édí ye míbɔann? Kaa! Fáve ya atsiŋŋ ye á mbwínánn. 28 Amú bí ke yaá dzian ná mot aa tɔbɔ nzósoó amú mbwínánn, kaa mibɔann míye átsiŋŋ.

29 Ye Nzamá a ne fáve éñí bejudio etámm? Ye ná a sés fe éñí méyɔŋ mefé? Áá, a ne fe éñí méyɔŋ mefé. 30 Dá é tɔɔ ná Nzamá a ne mbóó, éñe

fe aa ye bɔ ná ébá bé ne nkíkǵán akeé bé tɔbɔ nzósoó akála mbwínánn, ya ébá bá bé sés ki nkíkǵán akeé bá bé tɔbɔ fe nzósoó amú mbwínánn. ³¹Édo ná, ye bía vea atsiŋ amú mbwínánn? É sés bɔban amvála enziŋ! Fáve ná bía yémyémele atsiŋ.

Mbwínánn Abraam

4 ¹Édo ná, mfá Abraam é tará wea, nzá ddam bía ye dzó ná aá koan ya dɔ a tɔɔ mot binam? ²Amú ná ngé Abraam a ngá tɔbɔ nzósoó akála mibɔann, a belé é ddam aa vága ya dɔ, ve se mfá Nzamá. ³Amú ná, Mitsili myá dzó á yá?

“Ané Abraam a ngá bwíni Nzamá,
éde bé ngá lán ní ya dɔ nzósoó.

⁴Ve, éní aa bɔ eséññ, ntán báa lán ní wó ané dás, fáve amvála ané mvólá. ⁵Éní ní áá bɔ eséññ, ve eé bwíni ébe éní aa bɔ nzósoó é mot a ne kaa áko Nzamá wɔŋŋ, mbwínánn weñ bá lán ní wó nzósoó. ⁶Amvála ané David ní aa dzó fe dɔ, mfá abwará dá nzu ébe é mot Nzamá aa lán nzósoó, kaa mibɔann, ná:

⁷“Abwará ya é bot ntsamann metsiŋ weba ó ntɔɔ ndzwiiann; mísémm myeba myá báa nú ki fe tán.”

⁸“Abwará ya é mot Ntí áá ye lán nsémm weñ tám enziŋ.”

⁹Édo ná, abwará te, ye é ne fáve édí é bot bé ne nkíkǵán mekeé etámm? Ye ná é sés fe édí é bot bé ne kaa nkíkǵán mekeé? Amú bía dzó ná: Ébe Abraam mbwínánn bá lán wó mfá nzósoó. ¹⁰Édo ná, bé ngá lán ní wó á yá? Ye ákoan a ntɔɔ nkíkǵán akeé, ngé ki kaa ná á tɔbɔ nkíkǵán akeé? Éé mbé nkíkǵán akeé, fáve ná a tɔɔ kaa nkíkǵán akeé. ¹¹Véa, a ngá ñɔŋ ndem ye á nkíkǵán akeé amvála ané sitám ye á nzósoó ye á mbwínánn ntéññ tám a mbé kaa nkíkǵán akeé, ná ábɔ éséá ye é bot bése bá bwíni kaa nkíkǵán mekeé, á mfá ye ná bé lán fe bɔ nzósoó te. ¹²Ya éséá ye á nkíkǵán akeé, mfá é bot bé sés fáve bot béye á nkíkǵán akeé, fáve ná bá bee fe bibóga mébɔ bíye mbwínánn é tará wea Abraam éyɔŋ a mbé kaa nkíkǵán akeé.

É ngaá é mvɔŋ bot dzeñ

¹³Édo ná é ngaá bé ngá vé Abraam ngé ki é mvɔŋ bot dzeñ, ná aa ye ñɔŋ é sí ní tsígá, bée ndzí dɔ vé akála atsiŋ, fáve akála é nzósoó ye á mbwínánn. ¹⁴Amú ná ngé bot béye á métsiŋ ébɔ bé ne ya tsígá, mbwínánn ó ne nzeze, ngaá da e sés ki fe ya eban. ¹⁵Amú ná atsiŋ dá byéñ méyéá, ve é vóm atsiŋ é sés, ntsamann metsiŋ wá ó sés ki.

¹⁶ Amú dзам te, é ne akála mbwínánn, á mfá ye ná ó vakgan ya mvɔmm, ná ngaá eé tɔɔ nyémán mfá mvɔɲ ése, se fáve ébá béye metsiɲɲ, ve ya fe ébá béye á mbwínánn Abraam, éñí a ne é tará bía bésesé. ¹⁷ (Amvála ané é ne ntsilann ná: “Me téle yaá wa éséá ye ábwiññ meyɔɲ”), tará wea ébe éñí a ngá bwíni, dá yíli ná Nzamá, éñí aa vé miwúán eniɲ aa lwéé fe é byém bí sés amvála ané ngé bí ntɔɔ.

¹⁸ Ákoan ná oyan ó sés ki fe, éñe Abraam a ngá bwíni á ɲga yana, á mfá ye ná éñe á nzu bɔ éséá ye ábwiññ meyɔɲ, amvála ané édí bé ngá dzó ñí ná: “éñe é mvɔɲ dzwe da ye bɔ aaná.” ¹⁹ Éde ñí kaa áteák á mbwínánn été, eé ñú tán ná é ñúu deñ da é ntɔɔ ané nwúán, (ákoan á mbelé ané ntet mimbú), ábum Sara dá é tɔɔ fe ekom. ²⁰ Ve, eé ndzí belé akoɔp á nlém ngé ki ábɔ kaa ábwíni é ngaá Nzamá, fáve ná a ngá biñ nguu á mbwínánn été, eé vé Nzamá dúmá. ²¹ Abraam a ngá túga yem mvéáñ ná é Nzamá a ngá vé ngaá, a belé fe nguu ye ádzálá édí a ngá kyaa. ²² Akála te édo, mbwínánn weñ bé ngá lán ñí wɔ nzósoó.

²³ Ve, béé ndzí dɔ tsili dɔ fáve ákála deñ ná bé ngá lán ñí dɔ, ²⁴ ve ya fe ákála dea, bía ébá mbwínánn wá ye lánɲan; bía é bot bía bwíni éñí a ngá wómo Ntí wea Yesus míwúán, ²⁵ éñí bé ngá kee amú ntsamann metsiɲɲ wea, a wómo fe á mfá é nzósoó wea.

É ndem édzɲɲ Nzamá ébe bía

5 ¹ É tɔɔ ná, bí tɔɔ yaá benzósoó amú mbwínánn, ébe Nzamá bí ntɔɔ mvwaá akála Ntí wea Yesukristo. ² Amú ná ébe éñí fe bí mbelé añíí ákála mbwínánn mvɔmm te, édo bí yém fe été, bía vága fe ya é dúmá Nzamá édo é ne oyan. ³ Se fáve édo etámm, ya fe ná bía vága fe á nyénánn midzuúk été, bí yem ná midzuúk myá vé étɔɔ mbán; ⁴ Éde étɔɔ mbán dá dá bɔ mot ná á kyaba mikat, nkyabán mikat wá, oyan; ⁵ oyan wá wáá vé osoán amú ná édzɲɲ bé swii yaá bía dɔ mílém myea été akála Mfúfúp Nsísim bé ngá vé bía.

⁶ Amú, ákoan ná bí ngén ateák, éde é tám e ngá yian, Kristo a ngá wú akála é bot báá kɔ Nzamá wɔɲɲ. ⁷ Amú é ne ayéñ ná mot enziɲ á wú akála nzósoó mot; atwaa tám enziɲ mot enziɲ ñí a ne yébe ná aa wú akála mbamba mot. ⁸ Ve Nzamá ñí aa lére édzɲɲ deñ ébe bía ná Kristo a ngá wú akála dea, ákoan bí ngén bebo misémm. ⁹ Éde ádaɲɲ ná, bí ntɔɔ benzósoó éndagá amú mékií meñ, bía ye tɔɔ nkoránn ákála deñ ébe méyéá Nzamá. ¹⁰ Amú ná ngé é tám bí mbé minzínzɲɲ Nzamá bí ngá bera ke belé elat ákála áwú é Mwán weñ, ádaɲɲ ná niané bí bera yaá ke belé elat, bía ye tɔɔ nkoránn ákála éniɲ dzeñ. ¹¹ Se fáve édo etámm, ya fe ná bía vága ébe Nzamá amú Ntí wea Yesukristo, ákála éñe éndagá bí ñɔɲ yaá nkomann okaɲɲ bikwan.

Adán bá Yesukristo

¹² Édo ná, amvála ané nsémm ó ngá ñíí éniɲ ákála mot mbɔɔ, awú dá akála nsémm, néa éñe awú é ngá mana fe ñeɲ ébe bot bése, amú ná

bésese bá bɔ nsémm. ¹³Amú ná nsémm ó mbé éniɲ kaa ná atsiɲɲ é bɔ, ve é tám atsiɲɲ é sés, báá ñú nsémm tán. ¹⁴Ve déá, atéé ye ébe Adán akekwiñ ébe Moisés awú é ngá dzwée atwaa ébá bée ndzí bɔ nsémm ámvála Adán a ngá tsam atsiɲɲ, éñí a ne efonann ye é mot a mbé ná a nkún nzu.

¹⁵Ve é dás Nzamá dáá sian amvála ané ntsamann atsiɲɲ te; amú ná ngé ákála ntsamann atsiɲɲ mot mbóó abwiññ bot daá wú, dá danɲan ná ábwará Nzamá ya é dás deñ ákála ábwará mot mbóó, Yesukristo, bí ngá fwíige mfá abwiññ bot. ¹⁶Éde nsémm mot mbóó bé sés kanan ya wó ya dás te, amú ná nkíkán misan wá sɔ akála nsémm mbóó mfá meku, ve dás dá dá sɔ akála abwiññ ntsamann metsiɲɲ mfá átɔɔ bot benzósoó. ¹⁷Amú ná, ngé ákála ntsamann atsiɲɲ mot mbóó, éñe awú é ngá nzu dzwée, ntéññ avé akála mot mbóó, Yesukristo, bot bá ye danɲan dzwée éniɲ, ébá bá ñɔɲ abwiññ abwará ya dás ye á nzósoó.

¹⁸Édo ná amvála ané ntsamann metsiɲɲ mbóó ó ngá sùgan bɔ méku bot bése, amvála te fe mbɔann nzósoó mot mbóó ó ngá sùgan tɔɔ bot bése benzósoó mfá eniɲ. ¹⁹Amú ná ámvála mbɔann meló mot mbóó, é ngá sùgan tɔɔ abwiññ bot beɔ misémm; amvála te fe mbɔann mewók mot mbóó, abwiññ dá ye sùgan tɔɔ benzósoó.

²⁰Ve atsiɲɲ dá sian á mfá ye ná ntsamann metsiɲɲ ó fwíige, ve é vóm nsémm ó ngá fwíige, abwará dá é ngá danɲan fwíige. ²¹Éde amvála ané nsémm ó ngá dzwée mfá awú, amvála te fe abwará dá dá ye dzwée deé tɔɔ bot benzósoó mfá éniɲ é ne mbéámbéá ébe Ntí wea Yesukristo.

Áduubánn dá lat bía bíabe Kristo

6 ¹Éde, bía ye fá dzó á yá? Ye ná bía ye tsíni ya mbɔann nsémm, á mfá ye ná abwará dá é fwíige? ²É sés bɔban amvála enziɲ! Bía, é bot bí wú yaá mfá nsémm, amú dzé bía ye tsíni bíi niɲ á nsémm été? ³Ye mínáá yem ná bía é bot bése bí duuban yaá ébe Kristo Yesus, bí duuban yaá ébe áwú deñ été? ⁴Édo ná bí tɔɔ yaá ndzepbann bíabe bó ákála nduubán áwú été, á mfá ye ná amvála ané Kristo a ngá wómo míwúán mfá é dúmá Tará, amvála te fe bía bía ye wulu á mfefeñ eniɲ été.

⁵Amú ná ngé bí ntɔɔ nlatán bíabe bó ébe éfonann ye áwú deñ, bébélá bía ye fe dɔ átɔɔ ébe éfonann ye áwómó deñ. ⁶Éde míníí yem edí ná, nnomm mot wea wá tɔɔ nkelann á krús bá Kristo, á mfá ye ná é ñúu ye á nsémm dea eé tɔɔ ntsamann, á mfá ye ná bí táa bera tɔɔ aloá ye á nsémm. ⁷Amú ná, éñí a wú yaá, a tɔɔ yaá nzósoó á mfá nsémm. ⁸Ngé bí wú yaá bíabe Kristo, bía bwíni fe ná bía ye niɲ bíabe bó. ⁹Éde bíí yem ná niané Kristo aá wómo míwúán, áá ye bera wú; awú deé belé fe edzwée ébe éñe. ¹⁰Amú dá é tɔɔ ná aá wú, a ngá wú akála nsémm eyɔɲ evóó; ve éniɲ aa niɲ, aa niɲ á mfá Nzamá. ¹¹Amvála te fe mína, ñɔɲɲán mína bébyen ná míní wú yaá mfá nsémm, ve betétéá mfá Nzamá ébe Kristo Yesus.

¹²Édo ná, nsémm ó táa dzwée é ñúu mot binam denan, mfá ábo mikómánn míye á nlém wenan mewók; ¹³kaa ki átéle mészúk mé ñúu menan á mfá nsémm amvála ané byém bíye ékúkwtá, fáve ná télegán mína bébyen ósú Nzamá amvála ané betetéá énzénzanj bówú, mészúk mé ñúu menan má ósú Nzamá amvála ané byém bíye á nzósoó. ¹⁴Amú ná nsémm wáá ye belé edzwée ébe mína, míní sés fá átsinj ásí, ve fáve ábwará ásí.

Nganán ya etó oloá

¹⁵Éde á yá? Ye bía ye bo nsémm akála ná bí sés átsinj ásí, ve fáve ábwará ásí? É sés boban amvála enzinj! ¹⁶Ye mínáá yem ná é tám mína vé mína bébyen ébe mot enzinj amvála ané aloá mfá ábo ñí mewók, míní ne áloá éñí mína bo mewók; ngé nsémm á mfá awú, ngé ki mészúk á mfá nzósoó? ¹⁷Ve akíba ya Nzamá ná atwaa míní mbé aloá ye á nsémm, ve míní bo yaá mewók atée ye á nlém ébe amvála áyágalé bé ngá vé mína. ¹⁸Dá é tó ná mína tóbo filí á mfá nsémm, míní só bo aloá ye á nzósoó. ¹⁹(Ma kóbo ané mot, akála ateák ye é ñúu denan.) Amú ná amvála ané míní ngá téle mészúk mé ñúu menan ané aloá á mfá mvin mam ya fe mbéa bivée, amvála te fe éndagá télegán mészúk mé ñúu menan amvála ané aloá ye á nzósoó á mfá átoó eki.

²⁰Amú ná é tám míní mbé aloá ye á nsémm, míní mbé filí á mfá nzósoó. ²¹Éde nzá bibumá míní mbé míní belé tám te, ébe é mam míní nga wók yaá osoán éndagá? Amú ná asúgánn ye mam méte é ne awú. ²²Ve éndagá, míní tóbo yaá filí á mfá etó oloá ye á nsémm, éde míní ntó áloá Nzamá, ntóbán eki éwo míní belé ané ébumá denan, asúgánn dá é ne éni é ne mbéámbéa. ²³Amú ná ntánj nsémm ó ne awú, ve é dás Nzamá dá é ne éni é ne mbéámbéa ébe Kristo Yesus Ntí wea.

Nganán ya alúk

7 ¹Á bobédzanj, ye mínáá yem (ma kóbo fá ya ébá bá yem atsinj) ná atsinj dá dzwée mot fáve é tám a ngén a téa? ²Akála ná é miningá a ne álúk, a tsíí ya átsinj álúk é tám nnóm aa téa; ve ngé nnóm aa wú, a ne filí ébe átsinj álúk nnóm. ³Édo ná, é tám nnóm aa téa; ngé aa yén fám fé, bá ye ñí lwée ná mbo medzián; ve ngé nnóm aa wú, a ne filí ébe atsinj te, ó véa ngé aa lúk fám fé a sés mbo medzián.

⁴É bobédzanj bam ntéñ mbóó fe, mína mína tóbo fe nwúan á mfá atsinj ébe é ñúu Kristo, ná míní tóbo nlatán mínabe mot mfé, ébe éñí a ngá wómo á miwúan été, ná bía ye wúm bibumá á mfá Nzamá. ⁵Amú ná é tám bí ngá ni ané mot binam, atsinj é ngá bo ná bivée bíye á nsémm bí bo eséñ mészúk mé ñúu mea été, ná bí wúm bibumá bíye áwú. ⁶Ve éndagá bí tóbo yaá filí mfá atsinj niané bíá wú ébe é dzam é ngá ká bía, á mfá ye ná bí séan á mfefeñ eninj, se atsinj ntsilann ye á nnomm eninj.

Melúmán ya nsémm

7Éde bía ye dzó á yá? Ye ná atsiɲɲ é ne nsémm? É sés boban amvála enziɲ! Fáve ná mǎé mbé yem nsémm, ngé atsiɲɲ mé bɔ kaa dɔ; amú ná mǎé mbé yem miñamle, ngé atsiɲɲ é bɔ kaa ádzó ná: “Wǎá ye ñamle.” 8Ve nsémm wá weé ñɔɲ afóo akála mvéná, ané mé ngá sɔ́ ya ma miñamle memvála mése; amú ná kaa atsiɲɲ, nsémm o ne nwúán. 9Éde, tám enziɲ ma me ngá niɲ kaa atsiɲɲ; ve niané mvéná é ngá sɔ́, ané nsémm ó ngá belé eniɲ, 10éde ma me ngá wú. Ané me ngá nú tán ná é mvéná eé mbé mfá éniɲ, é ngá sùgan awú mfá wɔm. 11Amú ná nsémm wá ñɔɲ afóo akála mvéná, éde ó ngá duk ma, ya ákála deñ ó ywíñ fe ma.

12Édo ná, atsiɲɲ é ne eki, mvéná da e ne fe eki, ya nzósoó ya fe mvéáñ. 13Éde, ye édí é ne mvéáñ é veɲan yaá áwú mfá wɔm? É sés boban amvála enziɲ! Fáve ná nsémm á mfá ye ná ó léreban ná ó ne nsémm, éwɔ wá sùgan áwú ya nzenn ye édí é ne mvéáñ ná akála mvéná, nsémm ó dan bera nzu bɔ áɲgónó nsémm.

14Amú bía yem ná atsiɲɲ é ne édí ye á nsísim; ve ma me ne mot binam, bé kuan yaá fe ma ané óloá nsémm. 15Amú ná édí ma bɔ, mǎá wók dɔ; mǎá bɔ fá édí ma kómo bɔ, fáve ná, édí ma víni, édo ma bɔ. 16Éde, ngé ma bɔ édí mǎá kómo bɔ, ma yébe ná atsiɲɲ é ne mvéáñ. 17Ve, éndagá se fe ma ma bɔ dɔ, fáve ná nsémm ó tɔ́ ébe ma. 18Amú ma yem ná ébe ma, dá yíli ná á nlém wɔm été, dzam enziɲ ye é ne mvéáñ dǎé tɔ́ ma été; éde ná nkómánn éwɔ ó ne ébe ma, ve se ábɔ édí é ne mvéáñ! 19Éde mǎá bɔ fá é mvéáñ ma kómo bɔ, fáve ná ábé mǎá kómo bɔ, édo ma bɔ. 20Ngé édí mǎá kómo, édo ma bɔ, se fe ma ma bɔ dɔ, fáve ná nsémm ó tɔ́ ébe ma.

21Édo ná, ma koan ya atsiɲɲ dí, ná meé kómo bɔ mvéáñ, abé é ne ébe ma. 22Amú ná ma sán ya atsiɲɲ Nzamá ya é mot a ne ma été, 23ve ma yén amvála atsiɲɲ afé mésúk mé ñúu mam été, deé lúman ya atsiɲɲ ye ósímánn wɔm, dá biñ fe ma nkómm ye átsiɲɲ nsémm é tɔ́ ma mésúk mé ñúu été.

24Ngwáa ma ya engóngóó! Nzá aa ye ma koro ébe é ñúu dá ke ya ma áwú ñí? 25Ve akíba ya Nzamá ébe Ntí wea Yesukristo! Édo ná mámyen, ngúrǎ mfá ya ósímánn wɔm ma séan ya métsiɲɲ Nzamá, ve mfá mbóó ya mot ye á nlém, ma séan ya atsiɲɲ ye á nsémm.

Nsísim wá vé bía eniɲ

8 ¹Édo ná, éndagá meku menziɲ mé sés mfá é bot bé ntɔ́ ébe Kristo Yesus, [é bot bé ne kaa áwulu amvála ané nkómánn ye mot binam, fáve amvála ané nkómánn ye á Nsísim éwɔ ó ne.] ²Amú ná atsiɲɲ eniɲ ye á Nsísim ébe Kristo Yesus é tɔ́ yaá wa filí átsiɲɲ ye á nsémm ya édí ye áwú. ³Amú ná édí atsiɲɲ dǎé mbé bɔ, dá é tɔ́ ná eniɲ mot dá vé atsiɲɲ ateák, Nzamá éñe a bɔ yaá dɔ eé lóm é Mwán weñ émyen, éfonann mot

mbɔ nsémm, ya akála nsémm, vé nsémm méku ébe mot binam. ⁴A ngá bɔ dɔ á mfá ye ná é nzósoó atsiŋ á dzálában ébe bía, bía é bot bíá wulu amvála ané nlém mot wá kómo, fáve amvála ané Nsísim wá kómo.

⁵Amú ná ébá bá niŋ amvála ané nlém mot wá kómo, bá síman mam méye éniŋ mot; ve, ébá bá niŋ amvála ané Nsísim aa lére, bá é mam Nsísim. ⁶Amú ná ábwíí osímánn ébe mam méye éniŋ mot, é ne awú; ve ábwíí osímánn á Nsísim, é ne ñá eniŋ ya mvwaá; ⁷Édo ná osímánn mam méye éniŋ mot, wá síŋ Nzamá; amú ná wáá ke métsiŋ Nzamá ásí, amú ná ó sés ki dɔ bɔ. ⁸Éde é bot bá niŋ ané nlém mot ó ne bé sés vé Nzamá nlém mesán.

⁹Ve mína, mínáá niŋ amvála nlém mot ó ne, fáve amvála ané Nsísim a ne, dá é tɔɔ ná Nsísim Nzamá ó ntɔɔ ébe mína. Ve ngé mot enziŋ a ne kaa ábelé Nsísim Kristo, mot te a sés é mot weñ. ¹⁰Ve ngé Kristo a ne ébe mína, véa mot ye á nlém á ntɔɔ nwúán akála nsémm, ve nsísim ó ne ntétéá mfá nzósoó. ¹¹Éde, ngé Nsísim éñí a ngá wómo Yesus míwúán été ó tɔɔ ébe mína, éñí émyen a ngá wómo Kristo Yesus míwúán été, aa ye fe vé bíwúwúa mé ñúu byenan eniŋ ákála Nsísim weñ, éwí ó tɔɔ ébe mína.

¹²Édo ná, á bɔbédzaŋ, bíí belé mot ye á nlém mvólá, mfá ániŋ amvála ané mot ye á nlém aa kómo. ¹³Amú ná ngé míní niŋ amvála ané mot ye á nlém aa kómo, míní nkún nzu wú; ve ngé ákála Nsísim, mína ywíñ míbɔann mot ye á nlém, mína ye niŋ.

¹⁴Amú ná ébá béseé Nsísim Nzamá wá wulu ya bó, bot béte ébɔ bé ne é bwán Nzamá. ¹⁵Míní ndzí fá ñɔŋ nsísim etɔɔ oloá á mfá ábera ábúlán áko wɔŋŋ, fáve ná, míní ñɔŋ yaá Nsísim wá vé etɔɔ bwán, éwí wá bɔ bía ná bí yónán: “Ábba! Á Tará!” ¹⁶Nsísim émyen aa vé ngañiá á nsísim wea ná bí ne é bwán Nzamá. ¹⁷Éde, ngé bwán, bí ne fe beñɔŋ tsígá; ngúra mfá beñɔŋ tsígá Nzamá, ve mfá mbɔɔ beñɔŋ tsígá fufúlu bíabe Kristo, bíí dzuk fe bíabe bó, á mfá ye ná bí ke ñɔŋ dúmá fufúlu bíabe bó.

É dúmá dá nzu

¹⁸Amú ma lán ná midzuúk míye é tám ñí, báá yian kánan ya myɔ ya é dúmá é nkún léreban ébe bía. ¹⁹Amú ná ñá nkómánn éniŋ é ne mvelann ó ne ábira seŋ nléránn é bwán Nzamá. ²⁰Amú ná éniŋ é ne mvelann dá dzímle bebélá eban, se amú nkómánn weñ ébyen, fáve ákála éñe ñí a ngá téle eniŋ ya oyan. ²¹Édo ná, éniŋ é ne mvelann ébyen dá ye fe tɔbɔ filí ébe étɔɔ oloá ye ewúwúa ñúu mfá étɔɔ filí ye dúmá é bwán Nzamá. ²²Bía yem fá ná éniŋ é ne mvelann áse dá kɔŋle nsámá, dá dzuk fe fufúlu ya mitéñ mí myee anzukwíñ métám má; ²³se fáve édo etámm, fáve ná, ya fe bía bébyen, bía ébá bí mbelé Nsísim ané ngap ósúá, bía bía kɔŋle fe mílém myea été, bíí bíra seŋ ya nkómánn etɔɔ bwán, akoroga ye é ñúu dea. ²⁴Amú ná ya oyan te éwɔ bía tɔbɔ ya wɔ nkoránn; ve, oyan bé téa báá yana wɔ. Amú dzé fá báá yana édí mot á nga yén yaá? ²⁵Ve ngé bía yana édí bíá yén, bía bíra dɔ seŋ ya edzíp.

²⁶ Amvála te avóó ya avóó Nsísim wá wá nzu fe bía vwála ébe áteák dea; amú ná ámvála bía yian yaglan bíá yem dɔ, fáve ná Nsísim ébyen wá dzaa mfá wea, ya míkɔŋle mí ne kaa bifíá. ²⁷Ve éñí aa bíli milém mí bot, aa yem osímánn Nsísim, amú ná ané nkómánn Nzamá ó ne, aa dzaa mfá mítópbán mí bot.

Nzá aa ne bía kána ébe édziŋŋ Nzamá

²⁸ Éde bía yem ná, á mfá ébá bá dziŋ Nzamá, mam mése má vwála á mfá mvéáñ, ébá bété ébó a lwée yaá amvála ané ntélán mam weñ ó ne. ²⁹ Amú ná eé tára yem ébá aa tóp, ébó fe a ngá tára mana tsini ya nkómánn weñ, ná bé bɔ amvála ané efonann é Mwán weñ é né, mfá ábɔ Ntóó énzénzanŋ abwiññ bɔbéñanŋ. ³⁰ Éde, ébá tára yaá tóp, ébó fe a ngá lwée; ébá bá a ngá lwée, ébó fe a ngá tɔɔ nzósoó; ébá bá a ngá tɔɔ benzósoó, ébó fe a ngá vé dúmá.

³¹ Éde ébe é mam má, bía ye dzó á yá? Ngé Nzamá a ne é ngamm dea, nzá aa ye bía ke á ngamm áyát? ³² Éñí eé ndzí dzɔɔ é Mwán weñ émyen ya awú, fáve ná aá kee ñí ákála bía bésese, éde amú dzé áá ye fe bía vé mam mése á nzeze bíabe bɔ? ³³ Nzá aa ye sómán ébá Nzamá á tóp yaá? Nzamá éñe a ne éñí aa tɔɔ bot nzósoó. ³⁴ Nzá aa ye vé meku? Kristo Yesus éñe a ne éñí a ngá wú; ve ádaŋdanŋ ná, éñe a ngá wómo ya ná éñe a tɔɔ á mfá méyóm Nzamá, éñe fe aa yaglan ákála dea. ³⁵ Nzá aa ye bía kána ébe édziŋŋ Kristo? Ye midzuúk, ye eywiññ, ye ndzénján bot ásí, ye nzeñ, ye etɔɔ swésweññ, ye áŋgónó dzam, ye nzwaoken? ³⁶ Amvála ané é ntɔɔ ntsilann ná:

“Ákála dwe éɔ bí ntɔɔ ntélán áwú áyóp mos míse;
bé ñɔŋ yaá bía amvála ané mítómá bá ke kík!”

³⁷ Fáve ná mfá mam méte mése, bía danŋ ébá bé wún yaá ébe éñí a ngá dziŋ bía. ³⁸ Amú ná ma yem bébélá ná, atwaa awú, atwaa eniŋ, atwaa baángel, atwaa bidzwée, atwaa édí ye é tám ñí, atwaa édí é nkún nzu, atwaa menguu, ³⁹ atwaa édí ye ó yóp, atwaa édí ye édwá ó sí, kaa dzóm enziŋ efé ye é ne mvelann é sés bía kána ébe édziŋŋ Nzamá é ne ébe Kristo Yesus Ntí wea.

É mbamba etɔɔ áyɔŋ Nzamá é sí ñí

9 ¹ Ma kóɔɔ bébélá ébe Kristo, máá bɔ mineá, ósímánn ye á nlém wɔm fufúlu ya ma bíí vé dɔ ngañiá ébe Mfúfúp Nsísim; ² ná, ma bíra wórán eywiññ ya mitéñ á nlém wɔm éte kaa ásim. ³ Amú ná mámyen ma bɔ meé kómo bɔ mot bibonŋ ya áɔɔɔ nkánán bía Kristo ákála bɔbédzanŋ, bot béye áyɔŋ dam, ⁴ ébó bé ne bwann Beisraelita, ébó bé ne ya etɔɔ bwán, ya dúmá, ya bilat, ya ñɔŋŋán metsiŋŋ, ya ñá nkaŋann, ya fe

mengaá, ⁵ébo bé ne ya betará, é ne fe Kristo ní aa só ébe bó amvála ané mot binam, éní a ne byém bíse áyóp, éñe a ne Nzamá ye ólugu kómm áse. Amén.

⁶Mfá edí te, é sés ná efíá Nzamá édo é vus yaá. Amú ná se bot bése béye Israel, bé ne bwann bé Israel, ⁷éde bésesé bá bé sés ki bwán akála ná bé ne é mvɔɔ Abraam, fáve ná: “Ébe Isaak, éñe bá ye lwée ná é mvɔɔ dzwe;” ⁸dá yíli ná, se é bwán bá byála mébum ébo bé ne é bwán Nzamá, fáve bwán béye é ngaá Nzamá ébo bá lán ané mvɔɔ bot. ⁹Amú efíá ngaá édo ní ná: “Ébe é tám ní, ma ye bera só, ané Sara aa ye byéñ mwán.”

¹⁰Se fáve édo etámm, ve ya fe ná Rebeka áá ñɔɔ abum ébe mot mbóó, tará wea Isaak; ¹¹amú ná ákoan ná bwán béte bé ngén kaa ábyálá, kaa ki ábo dzam enziɔ, ané mvéañ, ané abé; ve á mfá ye ná ntélán mam Nzamá a tóp yaá éwo ó tɔbo, se ákála míboann mot, fáve ákála éní aa lwée.

¹²Éde, bé ngá dzó Rebeka ná: “Ñá mot aa ye séan ya móɔɔ,” ¹³amvála ané é ne ntsilann ná: “Me dziɔ yaá Jakob, ve me víni yaá Esau.”

¹⁴Éde bíá ye dzó á yá? Ye ná ekúkwát é ne ébe Nzamá? É sés bɔban amvála enziɔ! ¹⁵Amú ná aa dzó Moisés ná: “Ma ye yén engóngóó ébe éní ma ye kómo yén engóngóó; ma ye fe lére añep ébe éní ma ye kómo lére añep.” ¹⁶Édo ná, déé tsíí ná, éní aa kómo ngé ki éní aa yem nguu; fáve ná ébe Nzamá éní aa yén engóngóó. ¹⁷Amú ná mitsili myá dzó Faraón ná: “Akála dzam te ébyen édo me téle yaá wa, mfá ye ná me lére é nguu dam ébe wa, ya fe ná bé kat éyola dam fwéñ ébe sí áse.” ¹⁸Édo ná, ébe éní aa kómo éñe aa yén engóngóó, ya fe ébe éní aa kómo éñe aa bɔ nlém aleét.

¹⁹Dzam te édo wa ye ma dzó ná: “Amú dzé fá aa vé bidzo? Amú ná, nzá a dzip yaá nkómánn weñ?” ²⁰Á mot binam! O ne nzá á mfá ye ná o dwaan ya Nzamá? Ye é dzóm é ne ntéñán, é ne dzó éní a ngá téñ do ná: “Amú dzé waá bɔ ma ámvála dí?” ²¹Ngé ki ná ye ná mbo byém ya sí ekwánn, a sés filí mfá ábo ébe sí ekwánn te fóó ya fóó, ngúra elas mfá mbelán ngaɔɔ, edí evóó dá mfá nzeze mbelán?

²²Éde dzé ná ngé Nzamá eé kómo lére méyéá meñ ya fe álére é nguu deñ, véa ya abwiññ edzip é ngá nzomo bilas méyéá bí mbé nkomann mfá ntsamann? ²³Ye ná eé ndzí do bɔ mfá álére ntam ye á dúmá deñ ébe bílas bíye á nyénánn engóngóó, ébí a ngá tára koman á mfá dúmá? ²⁴Bía, ébá ní a ngá lwée fe, se fáve á bejudio été, ve ya fe ébe méyɔɔ mefé été. ²⁵Amvála ané aa dzó fe abá Oséas ná:

“Ébá bée mbé áyɔɔ dam,
ma ye lwée ná ‘áyɔɔ dam;’
éní ní é sés édziɔɔ dam,
éñe ma ye fe lwée ná ‘édziɔɔ dam’.

²⁶Aa ye bɔ ná é vóm bé ngá dzó bó ná:

‘Míní sés áyɔŋ dam,’
ó véa bá ye bɔ́ lwée ná,
‘é bwán é Nzamá a ne ntétéá.’ ”

²⁷Esaía nĩ aa yónán fe á mfá Israel ná:

“Afánbo ná é nɔmɔ bwann bé Israel e ne bo
ané nséléga ye ó mán,
fáve bit bot édo dá ye tɔbo nkoránn.

²⁸Amú ná avítsan tám Ntí aa ye dzálá éfiá deñ
ya nzósoó ébe eniŋ ngúra.”

²⁹Éde, amvála ané Esaía a ngá tára do kúlán ná:

“Ngé Ntí ye á misámá melúmán
á bo bía kaa álík ya mvɔŋ,
Ngé bía sùgan bo ané Sodoma,
ye áfonan fe ya Gomora.”

³⁰Nzá dzam fá bía ye dzó? Ye ná méyɔŋ mefé mé mbé kaa ádzén nzósoó,
émɔ mé koan yaá ya nzósoó, nzósoó ye á mbwínánn? ³¹Ve, Israel, éñí nĩ a
ngá dzén atsiŋŋ ye á nzósoó, éñe eé ndzí koan ya atsiŋŋ te. ³²Ákála dzé?
Amú ná éé ngá dzén nĩ ya mbwínánn, fáve ámvála é ne ya mibɔann; éde
bá vus nzenn ya ákwá ekɔp obaá, ³³amvála ané é ne ntsilann ná:

“Dággán, ma téle á Sión ákwá ekɔp obaá,
ya ákwá bá dzímle ya do mbwínánn.
Ve éñí aa ye nĩ bwíni áá ye wú osoán.”

Israel bá mbamba fwéñ

10 ¹É bɔbédzan bam, é dzam ma yén mvéáñ á nlém wɔm ya
méyaglán mam ébe Nzamá akála deba, é ne á mfá akoroga. ²Amú
ná ma vé ngañíá mfá weba ná bé ne abéánn ébe Nzamá, ve se á mfá
nyemann; ³amú ná bá kaa áyem é nzósoó Nzamá, bée dzén ná bé téle é
nzósoó weba bébyen, bá kaa fe áku é nzósoó Nzamá ásí. ⁴Amú ná atsiŋŋ
dá sùgan ébe Kristo mfá nzósoó ébe é mot áse aa bwíni.

⁵Amú ná mfá nzósoó ye átsiŋŋ, Moisés aa tsili ná: “É mot aa bo é mam
má, émɔ aa ye niŋ ya mɔ.” ⁶Ve é nzósoó ye á mbwínánn, aa dzó aaná: “O
táa sili á nlém we été ná: ‘Nzá aa ye bét á dzóp été?’ ” (Dzam te dá sili
Kristo ásí). ⁷“Ngé ki ná: ‘Nzá aa ye sigi édwá dzíbi ósí?’ ” (Dzam te dá sɔ
ya Kristo á miwúán été).

⁸Éde, aa dzó á yá? “Efíá é ne wa bebeñ, ánu dwe ya fe á nlém we été.” Édo é né, efíá ye á mbwínánn bía kat fwéñ, ⁹ná: Ngé wa mem ya ánu dwe ná Yesus éñe a ne Ntí, o bwíni fe á nlém we été ná Nzamá aa wómo ñí á miwúán été, wa ye tɔɔ nkoránn. ¹⁰Amú ná bá bwíni ya nlém á mfá nzósoó, anu édo dá bá mem ya do á mfá akoroga.

¹¹Mitsili myá dzó fá ná: “Éñí áse aa bwíni ñí, áá ye wú osoán.” ¹²Amú ná nzelann e sés ébe mwann Judio bá mwann Griego; Ntí fá a ne Ntí bésesé, eé bíra bwárán ya ébá bésesé bá yónán ya ñí; ¹³amú ná: “Éñí áse aa yónán ya éyola Ntí aa ye tɔɔ nkoránn.” ¹⁴Bá ye fá yónán ya éñí bée ndzí bwíni á yá? Bá ye fá bwíni éñí bée ndzí wók á yá? Bá ye ki béá á yá kaa é mot aa kat bó fwéñ? ¹⁵Éde ngé báá lóm bó, bá ye ki kat fwéñ á yá? Amvála ané é ne ntsilann ná: “Nzá mvéáñ e ne ya mebo ébá bá kat mbamba fwéñ édí é ne mvéáñ!”

¹⁶Ve deá, se bésesé ébó bé ngá bo mbamba fwéñ mewók. Amú Esaía aa dzó ná: “Á Ntí, nzá a bwíni yaá é fwéñ dea?” ¹⁷Édo é ne ná, mbwínánn wá sɔ amú nwókgánn, ve á nwókgánn amú efíá Kristo.

¹⁸Ve, ma ma síli ná, ye ná bée ndzí wók? Bébélá a ne ná bá wók:

“É kíñɔ deba dá é mana wɔɔ ébe sí áse,
efíá deñ dá é mana fe wɔɔ akekwiñ mevóm mése bot bé tɔɔ.”

¹⁹Ve ma síli ná: Ye ná Israel éé ngá yem? Édí ósúá, Moisés aa dzó ná:

“Ma ye mína sɔɔ abéánn ya áyɔɔ é sés ayɔɔ,
ya ébe áyɔɔ é ne kaa kén,
ma ye mína sɔɔ ya meyéá.”

²⁰Éde, Esaía ñí aa kɔɔ fe ya aywá, eé dzó ná:

“Ébe ébá bé mbé kaa ma ádzén,
bá koan ya ma;
Maá yéne ébe ébá
bé mbé kaa ásíli á mfá wɔm.”

²¹Ve á mfá Israel, aa dzó ná:

“Ngúrá ntéññ mos me sám yaá é mó mam
ébe áyɔɔ é ne meló é tɔɔ fe ma á ngamm áyát.”

Ámvála Nzamá aa koman mam

11 ¹Éde ma síli, ye ná Nzamá a tep yaá áyɔɔ deñ? É sés bɔban amvála enziñ! Amú ná ma me ne fe mwann Israelita, mot ye é

mvɔŋ bot Abraam, ébe áyɔŋ Benjamín. ²Nzamá eé ndzí tep áyɔŋ deñ, édí a ngá tára yem. Ye mínáá yem ki édí Mitsili myá dzó á mfá Elías, ámvála a ngá lére ósú Nzamá míkéá myeñ ya Israel, eé dzó ná: ³“Á Ntí, bé ywíñ yaá békúlu medzó bwe, bé tsam yaá fe mé altar mwe; éde ma etámm me lígi yaá, bá dzéŋ fe éniŋ dzam ásí?” ⁴Ve déá, éyalann Nzamá dá dzó ní á yá? “Mámyen me kána yaá á mfá wɔm bot táŋ binzuk zangbéá ébá béé ndzí kút Baal mebóŋŋ.”

⁵Ámvála te fe é tám ní, bit bot dá é ntɔɔ fe ámvála ntɔɔbán mvɔmm ó ne. ⁶Ve, ngé é ne ákála mvɔmm, dá deé sés fe éndagá amú mibɔann; ngé éñe é bɔ néa, ngé mvɔmm da deé sés ki fe mvɔmm. Ngé ákála mibɔann dá deé sés fe mvɔmm; ngé éñe néa, mibɔann mí sés fe mibɔann.

⁷Éde á yá? Édí Israel aa dzéŋ eé ndzí koan ya dɔ; ve ébá bé ne mitɔɔbán ébɔ bé koan ya dɔ, éde ébá bevɔɔ bá bá tɔbɔ ya milém aleét.

⁸Ámvála ané é ne ntsilann ná:

“Nzamá aá vé bɔ nsísim ndzemm,
é mís mé ne kaa áyén, ya meló mé ne kaa áwók,
anzukwíñ mos ye émuú.”

⁹David ní aa dzó fe ná:

“Méfét meba mé veŋan bɔ asimá ya olám,
Ekɔp obaá ya fe ntán mfá weba.

¹⁰Dzíbi é kpá bɔ á mís ná bé bɔ kaa áyén.

É mvús deba da eé tɔbɔgé fe bɔ é viri tám áse.”

¹¹Éde ma síli ná: Ye ná béé ndzí kɔp á mfá ye ná bé ku? É sés bɔban ámvála enziŋ! Fáve ná amú ntsamann metsiŋŋ weba ákoroga é sɔ yaá ébe meyɔŋ mefé, á mfá áɔŋ bɔ ya abéánn. ¹²Édɔ ná ngé ntsamann metsiŋŋ weba ó ne ntam á mfá éniŋ ngúra, ádzímlé deba dá ntam ébe meyɔŋ mefé. Ntéññ avé ndzálánn mvɔmm weba!

¹³Ve ma kóɔ ya mína, meyɔŋ mefé, dá é tɔɔ ná me ne ápostol meyɔŋ mefé, meé vé fe éséññ Nzamá dam ngaŋŋ, ¹⁴ná ngé me ne sɔŋ áyɔŋ dam ya abéánn, ngé bot benziŋ béye été bé ne tɔbɔ nkoránn. ¹⁵Amú ná ngé atsílánn deba dá bɔ ná eniŋ ngúra é bera belé elat; dzé dá ye bɔban ñɔŋŋán weba, ye se fáve eniŋ mfá bewú? ¹⁶Éde, ngé ngap ósúá e ne eki, níúu ése dá e ne fe dɔ; ngé ndzi ó ne eki, mitem myá mí ne fe dɔ.

¹⁷Ve ngé mitem minziŋ myá kíkban, éde wa o tɔɔ elé olíba ye áfan, bé sɔ wa bem énzénzɔŋ nkuk weba wa o ntɔɔ fe ñɔŋngap ye á mbamba mendzímm má sɔ mídzi mí ñá elé olíba, ¹⁸wá kaa ábɔ engúŋ ya mítem; ve ngé wa bɔ engúŋ, se wa wa yála midzi, fáve ná midzi émyɔ myá yála wa.

¹⁹Ve déá, wa ye dzó ná: “Mitem myá kíkban á mfá ye ná ma me tɔbo mbemann á nkuk”. ²⁰Éde véa, bá kík myɔ amú é kaa mbwínánn weba, ve wa o téle akála mbwínánn. O táa bo engún! Fáve ná áko wɔŋŋ; ²¹amú ná ngé Nzamá eé ndzí dzɔgo beńá mitem, wa áá ye ki dzɔgo. ²²Dággé fá áñep ya é ngét Nzamá; ngét mfá ébá bé ngá ku, ve ésós Nzamá dá á mfá we, ngé wa tɔbo ésós deń été; ngé se néa wa wa ye fe tɔbo nkíkán. ²³Ve, á mfá ébó, ngé bá ye bo kaa álanjan átɔbo kaa ábwíni, bá ye bó bem á nkuk, amú ná Nzamá a belé nguú ye á bera bó bem. ²⁴Amú ná ngé wa é mot bá kík ébe elé olíba ébyen ye áfan, bé só wa bem ébe ńá elé olíba, édí dáá yian, ntéńń avé ébá bébyen bé ne beńá mitem, bá ye bó bem ébe á nkuk olíba weba bébyen?

Israel áse aa ye tɔbo nkoránn

²⁵Á bobédzan, máá kómo ná míní dzími é ddam dá nzaman kén mot dí, á mfá ye ná míní nzá vága ye á nyemann wenan, é ne ná: ábímm áleét nlém é kwíń yaá ébe Israel, dá ye tɔbo akekwiń ané nɔmɔ bot béye meyoŋ mefé dá yian aa ye mana ńíi. ²⁶Éde véa, Israel áse aa ye tɔbo nkoránn; amvála ané é ne ntsilann ná:

“Mvé bot filí aa ye só á Sión;
aa ye vea abé ébe Jakob.

²⁷Éde élat dam bíabe bó,
édo dí é tám ma ye vea mísémm myeba.”

²⁸Á mfá mbamba fwéń, bé ne minzínzínŋ akála denan; ve á mfá ntɔpbán Nzamá, bé ne mindzindzínŋ akála beéséá; ²⁹amú ná dás ya ékígá Nzamá áá bera byo vea. ³⁰Édo ná, amvála ané mína míní ngá tára bo Nzamá meló, ve éndagá míní koan yaá ya mvɔmm akála meló meba, ³¹ntéńń mbóó fe éndagá, bá bé bo yaá meló, á mfá ye ná nyénánn engóngóó Nzamá a lére yaá wa, ya fe ná éndagá, bá a lére fe nyénánn engóngóó. ³²Amú ná Nzamá aá dzili bot bése á meló été, á mfá ye ná á lére fe bésesé mvɔmm.

³³Nzá ámvála nnén ntam, ya é kén, ya nyemann Nzamá bí né! Nzá ayéń é ne ná bé yem nkíkán misaŋ weń, ya ndzuúk ye áyem ménzenn meń!

³⁴“Nzá fá a yem yaá ósímánn Ntí?
Nzá ki a bo yaá mvé melépgá weń?

³⁵Ngé ki ná nzá a tára yaá ńí vé,
á mfá ye ná ńí á bera ńí búlán.”

³⁶Amú ná ébe éńe, ya akála éńe, ya mfá éńe, mam mése mé né. Éńe á bóóge ya dúmá kómm áse. Amén.

Mfefeñ éniŋ

12 ¹Édo ná, á bɔbédzan, ma lép mína á mfá nyénánn engóngóó Nzamá ná télegán mína bébyen amvála ané ntétéá mótúnŋa ya eki, émo Nzamá aa sán ya mo, édo é ne ñá nkaŋann Nzamá. ²Kaa niŋŋán amvála ané bot béye é tám ñí, fáve ná tsénŋán mína bébyen ya nzenn ye á mfefeñ atémŋa denan, véa éñe mína ye lére nkómánn Nzamá, éwí ó ne mvéáñ, ya ávé mesán ya fe tételé.

³Amú ná, ya ébe é mvɔmm bé vé yaá ma, ma dzó kada mot ye ébe mína, ná a táa ñɔŋ ná éñe a ne ya eban álot ábímm dá yian, fáve ná á ñɔŋŋe do ya mbamba kén, ya ábímm mbwínánn Nzamá a vé yaá ébe kada mot. ⁴Amú ná amvála ané ó ñúu fɔ́ɔ́ bí belé abwiññ mesúk mé ñúu, ve mesúk mé ñúu mése mée belé amvála eséññ avóó, ⁵amvála te bía bí tɔ́ɔ́ abwiññ, bí ne ñúu fɔ́ɔ́ ébe Kristo, kada mot ye ébe bía ñí a ne ásíuk ñúu ébá bevóó.

⁶Édo é ne ná, bíí belé bivévé myá selan amvála ané é mvɔmm bé vé yaá bía; ngé éwí nkúlánn medzó, ábelan ya wó amvála ábímm mbwínánn dwe ó ne. ⁷Ngé éwí ábo eséññ Nzamá, ábelan ya wó; ngé ki éwí áyágale, á yágale; ⁸ngé mvɔmm ye mfoŋann mílém, á foŋŋe; éñí aa vé, ya añep; éñí aa dzwée, á dzwéegé ya akéŋŋ áse; éñí a belé nyénánn engóngóó, á bɔ́ɔ́ge do ya mesán.

É mam Krísten aa yian bo

⁹Edziŋŋ é bɔ́ɔ́ge kaa meduk; míníí víní ekúkwát, biñŋán edí é ne mvéáñ. ¹⁰Ábelé edziŋŋ bɔbénafwáa bevóó ya ébá bevóó; á mfá nganŋ, míníí tára téle é bot bevóó ósúá;

¹¹ébe edí dá dzaa akéŋŋ áse, míníí táa bo andeát; áséan ya Ntí ya nlém ósesé; ¹²ébe oyan, míníí sán; ébe midzuúk, míníí nzomo; ébe méyaglán, míníí tɔ́ɔ́ mbán; ¹³míníí vwála ébe é mam má yi á mfá bebwíni, míníí ñɔŋ beyén.

¹⁴Abwará ya é bot bá dzén mína ásí, váán abwará kaa váán bó biboŋ.

¹⁵Sánŋán ya ébá bá sán, yigán fe ya ébá bá yi.

¹⁶Belégán amvála ósímánn ovóó ébe bevóó ya ébá bevóó; kaa ábélán mína bébyen ó yóp ásímánn denan été, fáve ná tɔ́ɔ́gán mfulán ya ébá bé ne nsilann ósí. Míníí táa bo miyemann ásímánn denan été.

¹⁷Kaa ábúlu ya mot enziŋ abé ya abé; dzénŋán ná míníí bo edí é ne mvéáñ énzénzan bot bése. ¹⁸Ngé é ne boban, á mfá wenan, tɔ́ɔ́gán mvwaá ya bot bése; ¹⁹Á mindzindziŋŋ, kaa kunŋán mína bébyen, fáve ná váán afóo á mfá méyéá Nzamá, amú é ne ntsilann ná: “Akunŋa é ne éedam; ma ye búlu ntán”, Ntí éñe aa dzó. ²⁰Fáve ná:

“ngé nzínzínŋ we wá wók nzeñ, vá ñí bidzí;

ngé aa wók ki evéé, vá ñí ná áñú;

amú ná weé bɔ néa, wa ye ní koman mekak mé ndúán á nló áyóp.”
²¹ Abé, édo é táa wa wún, fáve ná wúnɛ abé ya mbɔann mbeɲ.

Átɔbɔ édzwée ngómán ásí

13 ¹ Mot áse á kpá bidzwée bí ne ní áyóp ásí, amú ná edzwée enziɲ é sés ná é sés édí Nzamá; ve ébí bí ne Nzamá éñe á ngá téle byɔ. ² Édo ná, éñí a ne edzwée á ngamm áyát, édí Nzamá a téle yaá édo ní aa sóán ya dɔ; ébá bá bá ke á ngamm áyát, bébyen bá ñɔɲ mekira. ³ Amú ná bedzwée bé sés ekɔwɔɲ á mfá é mot aa bɔ mbeɲ, fáve éñí aa bɔ abé. Ye wa kómo bɔ kaa ákɔ edzwée wɔɲɲ? Bɔ́ge édí é ne mvéáñ, véa edzwée dá ye wa sák; ⁴ amú ná mvwála bíséññ Nzamá a ne á mfá é mvéáñ dwe. Ve ngé wa bɔ abé, kɔge wɔɲɲ; amú ná éé belé nzwaoken á nzeze, akála ná a ne mvwála bíséññ Nzamá ná á vé akunɲa á mfá é mot aa bɔ abé. ⁵ Ya amú dzam te, dá yian ná mína ku edzwée ásí, se fáve akála akira, ve ya fe akála ósímánn ye á nlém. ⁶ Ya amú dzam te fe mína yáán mfónsɪ, amú ná bedzwée bé ne bébɔ biséññ Nzamá, édo fe bá bá bɔ ntéññ éniɲ.

⁷ Yáágán ya mot áse é mvólá míní belé ñí; éñí mfónsɪ, mfónsɪ; éñí meyáán, meyáán; éñí wɔɲɲ, wɔɲɲ; éñí ngaɲɲ, ngaɲɲ.

⁸ Míní táa belé mot enziɲ mvólá, fáve ná dziɲɲán bevɔ́ɔ ya ébá bevɔ́ɔ; amú ná é mot aa dziɲ éñí mbɔ́ɔ, a dzálá yaá atsiɲɲ. ⁹ Amú ná édí: “Wáá ye bɔ medzián, wáá ye ywíñ, wáá ye dzip, wáá ye ñamle”, é mvéná ése evɔ́ɔ, dá sùgán ya édí: “Wa ye dziɲ é mot mbɔ́ɔ amvála ané wa dziɲ wámyen”. ¹⁰ Édziɲɲ dáá bɔ é mot mbɔ́ɔ abé; éde edziɲɲ édo é ne ndzálánn atsiɲɲ.

¹¹ Ébe dzam te, míní yem é tám ñí, amú ná á ntɔ́ɔ áwola bá vee óyó, akála ná ákoroga dea é ntɔ́ɔ bebeñ áwola dí álot é tám bí ngá tára bwíni. ¹² Alú é ntɔ́ɔ oyaáp, kíri da eé ntɔ́ɔ bebeñ; édo ná bí veagán mibɔann míye ó dzíbi, bí bwátgán mengéá méye éyéá. ¹³ Bí niɲɲán á ngaɲɲ été, amvála ané éyéá été, se á mbéa mefét bá yénán befám ya biningá, ya áfían meywa; se nsémm eveák, ngé ki áyénán biningá endendea, se á mitéé, ngé ki abéánn. ¹⁴ Fáve ná, Ntí Yesukristo á tɔbɔ́ge ndzálánn ébe mína, kaa dzéɲɲán ki ná míní dzálá bívée bíye á nlém mot.

Mitéteák ya mingungúú

14 ¹ Ñɔɲɲán éñí a ne ntéteák á mbwínánn kaa ábɔ ya ní mikéá. ² Ngúrá mot wá bwíni ná ó ne dí byém bíse, ve éñí a ne ntéteák, aa dí fáve bilwá. ³ Éñí aa dí, a táa byana éñí a ne kaa ádzí; éde éñí a ne kaa ádzí, a táa kík éñí aa dí nsáɲ, amú ná Nzamá a ñɔɲ yaá ní. ⁴ O ne nzá ná wa kík éyá mbɔ biséññ ye á ndá misáɲ? Mfá é mása weñ a téle ngé ki ná aa ku; aa ye lígi a téle tételé, amú ná mása a ne nguu ye átéle ní tételé. ⁵ Éde, ngúrá mot wá kík nsáɲ ná mos enziɲ wá daɲ éwí mbɔ́ɔ ya eban, éñí mbɔ́ɔ ní aa kík nsáɲ ná mos míse mí ne amvála avɔ́ɔ. Kada mot á túga

yébe édí é ne ñí ósímánn weñ été. ⁶Éñí aa baale ngúrá mos, aa baale wó á mfá Ntí [éñí ñí áa baale ngúrá mos, áa baale wó á mfá Ntí]. Éñí ñí aa dzí, aa dzí á mfá Ntí, amú ná aa vé Nzamá akíba. Éñí a ne kaa ádzí, aa ki bidzí á mfá Ntí, aa vé fe Nzamá akíba.

⁷Amú ná mot enziñ ye ébe bía áa niñ mfá weñ émyen, mot enziñ ñí áa wú ki fe mfá weñ émyen; ⁸éde ngé bía niñ, bía niñ á mfá Ntí; ngé bía wú ki, bía wú mfá Ntí; éde ná, a ne bo ná ngé bía niñ, a ne ki bo ná ngé bía wú ki, bí ne ébá Ntí. ⁹Amú ná akála te édo Kristo aa wú, aa niñ fe, á mfá ye ná á bo Ntí ané ébá bé ne míwúán ané ébá bé ne betétéá.

¹⁰Ve wa, amú dzé wa kík mwanñonñ nsan? Ngé ki ná, á wa, amú dzé wa byana mwanñonñ? Amú ná bía bésesé bía ye ke tébe ébe ású étó nkíkgán misan Nzamá. ¹¹Amú é ne ntsilann ná:

“Ntí aa dzó ná, ma niñ,
éde abónñ ése dá ye kútbe ébe ású dam,
dém ése dá dá ye fe mem Nzamá”.

¹²Édo é ne ná, kada mot ye ébe bía aa ye vé Nzamá tán mfá weñ émyen.

¹³Édo fá ná, bí kaa ábera kík misan bevóó ya ébá bevóó, fáve ná bí belégé nkíkgán nsan wí ná, kaa ábwí mwadzan enziñ é dzóm aa vus ya do nzenn, ngé ki é dzam dá bo ñí ná á ku. ¹⁴Éde ma yem, me toó fe ya mebúnn ébe Ntí Yesus ná dzóm enziñ é sés eki ébe ébyen; fáve mfá éñí aa ñonñ ná dzóm te é ne eki, á mfá mot te émyen éñe é ne eki. ¹⁵Amú ná ngé mwanñonñ aa tobo eywiññ ákála bidzí, véa wéé toó fe niñ édziñ été. O táa bo ná éñí Kristo a ngá wú ya akála deñ á dzán ya bidzí bywe. ¹⁶Édo ná, míní táa lík ná bé kóbo abé édí é ne mvéáñ mfá wenan. ¹⁷Amú ná édzwée ngómán Nzamá é sés bidzí ngé ki meñú, fáve nzósoó, mvwaá ya mesán á Mfufúp Nsísim été. ¹⁸Amú ná é mot aa séan ya Kristo amvála te, aa vé Nzamá nlém mesán, bot bá bá sák fe ñí.

¹⁹Édo véa, bí dzéñgán ya nlém ósesé é mam má vwála á mfá mvwaá ya ávé bot nguu énzénzan dea. ²⁰O táa tsam éséññ Nzamá ákála bidzí. Ngúrá mfá, byém bíse bí ne mífúbánn, ve mfá mbóó, é ne abé ná mot a bo ná éñí mbóó á ku á nsémm ya bidzí. ²¹É ne mvéáñ ná mot á bo kaa ádzí tsít, kaa áñú vino, kaa ki ábo é dzam dá bo ná mwanñonñ á ku á nsémm. ²²Mbwínánn o belé, baale wó mfá we ósú Nzamá. Mvómm ya éñí a ne kaa ávé émyen meku ébe édí aa ñonñ ná é ne mvéáñ. ²³Ve, éñí aa dzí eé yep, aa vé émyen meku, amú ná áa bo do ya mbwínánn; éde édí ése dá bá bo kaa mbwínánn, é ne nsémm.

Ábee éfonann Kristo

15 ¹Édo ná, bía é bot bí yém, bía yian nzomo áteák ébá bé ne mitéteák, se ná bí bo é mam bía bébyen bía yén mvéáñ. ²Kada mot á dzéñye ébe éñí mbóó édí é ne mvéáñ á mfá ávé bot nguu. ³Amú ná

atwaa Kristo émyen ní eé ndzí ki dzéŋ édí é ne mvéáñ á mfá weñ, fáve ané é ne ntsilann ná: “Méteá é bot bá kpógo wa, maá ku ma á nló wɔm”.
⁴Amú ná édí dá tɔbo ntsilann á metám ómvús, baá tsili dɔ ákála áyágalé dea, á mfá ye ná édzíp ya mfoŋann nlém bí ne á Mitsili été, bía bí belé oyan. ⁵Éde Nzamá ye édzíp ya mfoŋann nlém á vá mína ná míní belé osímánn ovúú énzénzan denan amvála ané éwí Kristo Yesus, ⁶á mfá ye ná fufúlu ya kíŋŋ fúú, míní vé Nzamá ya Éséá Ntí wea Yesukristo dúmá.

⁷Ya amú dzam te, ñɔŋŋán bevúú ya ébá bevúú, amvála ané Kristo ní aa ñɔŋ fe mína á mfá é dúmá Nzamá. ⁸Amú ma dzó ná Kristo ní aa bɔ yaá mvwála bíséññ ye ébá bé ne nkíkŋán mekeé ákála é bébélá Nzamá; á mfá áyémele mengaá bé ngá kyaa betará, ⁹ya fe á mfá ye ná meyɔŋ mefé mé vé Nzamá dúmá ya nyénánn engóngúú weñ; amvála ané é ne ntsilann ná:

“Ya dzam te, ma ye wa mem énzénzan meyɔŋ mefé,
 ma ye yee éyola dwe byeá bí olugú”.

¹⁰Aa bera dzó ná:

“Á meyɔŋ mefé sánŋán, mínabe áyɔŋ deñ”.

¹¹Aa bera fe dzó ná:

“Lugán Ntí mína meyɔŋ mefé mése;
 bot bése lugán ñí”.

¹²Esaía ní aa bera dzó ná:

“É tsín Esaí dá ye féá,
 édo dá ye tébe ná dá dzwée bot béye meyɔŋ mefé,
 bot bése bá ye tɔbo ya ní mebúnn”.

¹³Éde Nzamá ye oyan á dzálágé mína ya mesán mése ya mvwaá akála mbwínánn, á mfá ye ná míní tɔbo ya abwiññ oyan akála nguu ye á Mfúfúp Nsísim.

Éséññ apostol Pablo

¹⁴Á bɔbédzan, á mfá wenan, mámyen ma yem bébélá ná, míní ne ndzálánn ya añep ya nyemann ósesé, míní ne fe veán melépgá bevúú ya ébá bevúú. ¹⁵Ve me tsili yaá mína mam menziŋ ya aywá, á mfá ye ná néa me vé mína mɔ osímánn, amú é mvɔmm Nzamá bé vé yaá ma, ¹⁶á mfá ye ábo mbo biséññ Kristo Yesus ébe meyɔŋ mefé, meé bɔ eséññ nkatann mbamba fwéñ Nzamá amvála ané fára, ná meyɔŋ mefé mé bɔ ní metúnŋa bá yébe, ná bé tɔbo fe eki á Mfúfúp Nsísim.

¹⁷Édo ná, ébe Kristo Yesus éñe mé koan ákéá ma vága ya dɔ ébe eséññ ma bɔ Nzamá. ¹⁸Amú ná mää ye yébe ná ma kɔbo dzam enziŋ afé, fáve édí Kristo a bɔ yaá ébe ma, á mfá mboann méwók meyɔŋ mefé, éfiá ya fe á mboann, ¹⁹amú nguu ye á mendem ya biyágán bí mam; ákála é nguu Nsísim Nzamá; amvála te, atée ye á Yerusalen ya mévóm má boman ní, akekwiñ Elíriko me dzálá yaá ní ya é mbamba fwéñ Kristo. ²⁰Amvála te édo, me ngá dzéŋ ná me kat mbamba fwéñ é vóm bé ngén kaa áwók éyola

Kristo, á mfá ye ná me nzá lón éyá mbókga áyóp, ²¹ve amvála ané é ne ntsilann ná:

“Ébe ébá béé ndzí ñɔɔ é fwéñ deñ, bá ye ñí yén;
ébá bá béé ndzí wók, bá ye yem.”

Ngoman ekena

²²Akála dzam te, abwiññ biyɔɔ me kómo yaá mína nzu yén, ve bé dzip yaá me dɔ. ²³Éde éndagá, ma kaa ki fe ya afóo vóm enziɔ ye á mebeɔɔ mé sí má, ve dá é ntɔɔ abwiññ mibú mé belé nkómánn ye ánzú ébe mína, ²⁴é tám ma ye ke á Pañá, ma ye mína fép. Amú ná ma ye mína yén, meé lot, á mfá ye ná míní vwála ma tsíni ekena ósú ó véa, éyɔɔ míní tára yaá ma vé mesán á nlém ébe etɔɔ bíabe mína oyomm tám enziɔ. ²⁵Ve éndagá ma ke á Yerusalen, á mfá áke ya bébwíni bé ne ó wéñ avwálá. ²⁶Amú ná Masedonia bá Akaya bá yén mvéáñ ná bé kóán avwálá á mfá mítétéññ mí ne énzénzɔɔ bebwíni á Yerusalen. ²⁷Akála bá yén mvéáñ ná bé bó dɔ, afáɔɔ ná bá bé belé fe bó mvólá; amú ná ngé meyɔɔ mefé mé ñɔɔ yaá ngap ébe bíbwárán bíye á nsísim byeba, bá bá yian fe bó vé ngap ébe byém bíye éniɔ dzí. ²⁸Édɔ ná, niané me mana yaá dzálá dzam te, me mana fe bó kee avwálá te, ma ye ke á Pañá, meé lot ébe mína. ²⁹Ma yem fe ná éyɔɔ ma ye nzu, ma ye só ya mína bíbwárán Kristo ndzálánn.

³⁰Á bobédzɔɔ, ákála Ntí wea Yesukristo ye ákála édziɔɔ Nsísim, ma lép mína ná míní vé nguu fufúlu bíabe mína á meyaglán menan ébe Nzamá ákála dam, ³¹á mfá ye ná mé tɔɔ nkoránn ébe ébá bé ne kaa ábwíni bé ne á Judea, ya ávwála ma ke ya dɔ á Yerusalen dá bobédzɔɔ bé ñɔɔ fe dɔ ya mesán, ³²ya á mfá ye ná amú nkómánn Nzamá mé sian ya mesán ébe mína, ná me waabe fe bíabe mína. ³³Nzamá ye á mvwaá á tɔɔgé ya mína bésesé. Amén.

Ábérán ya kada mot

16 ¹Ma lére mína mbamba kéa dzea Febe, a ne fe mvwála bíséññ ye ékóánn bebwíni é ne á Senkrea; ²ná míní ñɔɔ ñí ébe Ntí, ámvála dá ñep ya bebwíni, ya fe ná míní vwála ñí ébe é dzam ése a ne yi ébe mína, amú ná ñí a vwála yaá fe abwiññ bot, atwaa mámyen.

³Bérágán ma ya Prisila bá Akila, ébá bíabe bó bía bɔ eséññ ébe Kristo Yesus, ⁴bot bété bé ngá ye wú akála éniɔ dzam, se fáve ma etámm ma vé bó akíba, ve ya fe bíkóánn bebwíni meyɔɔ mefé bise, ⁵ya ékóánn bebwíni é ne é ndá dzeba. Bérágán ma ya ndzindziɔɔ mwadzɔɔ wɔm Epeneto, mbwíni Kristo ósúá ye á Asia. ⁶Bérágán ma ya María éñí a bɔ yaá eséññ abwiññ énzénzɔɔ denan. ⁷Bérágán ma ya Andróniko bá Junias, bívúvúmán byam bíabe bó bí mbé fe fufúlu á ndá mibok, bá yem fe bó énzénzɔɔ baapostol, ébɔ fe bá tára bwíni Kristo ya ma.

⁸Bérágán ma ya Amplias, ndzindziɔɔ mwadzɔɔ wɔm ébe Ntí. ⁹Bérágán ma ya Urbano, éñí bíabe bó bía bɔ eséññ fufúlu ébe Ntí, ya ndzindziɔɔ

mwadzaŋ wɔm Estakis. ¹⁰Bérágán ma ya Apeles éñí a kyaba yaá Kristo. Bérágán fe ma ya ébá béye ébe Aristóbulo. ¹¹Bérágán ma ya Erodión, évúvúmán dam. Bérágán fe ma ya ébá béye ébe Narsiso, ébá béte bá bé ne fe ébe Ntí. ¹²Bérágán ma ya Trifena bá Trifosa, ébá béte bá bɔ eséññ Ntí. Bérágán ma ya ndzindziŋŋ kéá dzéa Pérsida éñí a bɔ yaá eséññ Ntí abwiññ. ¹³Bérágán ma ya Rufo, éñí a ne ntópbán ébe Ntí, ya ñiá, ñí a tɔ́ fe ané naná. ¹⁴Bérágán ma ya Asínkrito, ya Flegonte, ya Ermas, ya Patrobas, ya Ermas, bábe é bɔbédzaŋ bábe bɔ́ bé tɔ́. ¹⁵Bérágán ma ya Filólogo bá Julia, ya Nereo bá kéá, ya Olimpás, bábe bekrísten bése bábe bɔ́ bé tɔ́.

¹⁶Bérágán ma ya bevɔ́ɔ ya ébá bevɔ́ɔ ya ñáŋán memáŋŋ bɔbéñafwáa. Bíkóánn bebwíni bíse Kristo byá bérán ya mína.

¹⁷Á bɔbédzaŋ, ma lép mína ná, míní bíli ébá bá nzu ya mína nkánán béé bɔ fe mína ná míní vus é nzenn áyágalé míní ñɔŋ yaá. Kólogán énzénzaŋ deba été; ¹⁸amú ná bot béte báá séan ya Ntí wea Yesukristo, fáve édí bídzí byá ke mébum meba; bá duk mílém é bot bé ne bindúnn béé kɔ́bɔ bɔ́ bembamba bífiá ya ébí bá dziŋ bá wók. ¹⁹Éde fwéñ ye méwók menan é kwíñ yaá ébe bot bése; ya dzam te édo ma sán ákála denan. Ve ma kómo ná míní bɔ bebelé kén á mfá édí é ne mvéáñ, ve mikeññ á mfá édí é ne abé. ²⁰Avítsaŋ tám Nzamá ye á mvwaá aa ye bwíñ Sátan mébɔ menan así. É mvɔmm Ntí wea Yesukristo eé bɔ́ge ya mína.

²¹Timoteo, é mot bía ñí bía bɔ eséññ aa bérán ya mína, ya Lusio, ya Jasón ya Sosípater, bívúvúmán byam.

²²Ma Tersio, éñí a tsili yaá é kálara ñí, ma bérán ya mína ébe Ntí.

²³Gayo, éñí mé tɔ́ ndá ya ékóánn bebwíni ése, aa bérán ya mína. Erasto, mbaale akúmm ye á kísoan aa bérán ya mína, ya mwadzaŋ Cuarto. ²⁴[É mvɔmm Ntí wea Yesukristo eé tɔ́bɔgé ya mína bése. Amén.]

Asúgánn ávé Nzamá olugú

²⁵Ébe éñí a ne nguu ye átele mína, ané é mbamba fwéñ wɔm ya nkatann fwéñ Yesukristo, amvála ané é kúlu yaá é dzam dá nzaman kén mot é mbé é tɔ́ ásweññ atéé ye metám ókuá, ²⁶ve, éndagá é léreban yaá amú Mítsili bekúlu medzó, amvála ané é mvéná é Nzamá a ne mbéámbéá, ná meyoŋ mefé mése mé yem mewók mé ne akála mbwínánn.

²⁷É Nzamá etámm a ne Mbelé kén, éñí a ne ya dúmá kómm áse amú Yesukristo. Amén.